

# DIARIO ONLINE STAY CONNECTED!

KEDA CONECTA!

www.diarario.aw

Noticia • Sports • Social y mas . . .

## Premio Cultural Playa Pabao 2010 otorga na Victor Adriaan Albus

ORANJESTAD (AAN): Directiva di Centro di Bario Playa Pabao e aña aki ta otorga "Premio Cultural Playa Pabao" na Victor Adriaan Albus. Aña pasa tabata Robert Jeand'or cu a recibi e premio aki pero meta di e premio aki ta cu esnan cu destaca den deporte tambe ta bin na remarca pa e premio aki.


Pa celebra esaki tin un exposicion cu lo tuma lugar dia 18 di maart na Centro di Playa Pabao. Victor Albus a nace riba 6 di maart na aña 1945, e school cu el a bishita tabata Sint Dominicus College (MULO). Victor tabatin 21 aña casa y e tin 2 yiu homber, di cual un ta na Hulanda y e otro ta na Bonaire.

Su dos yiunan Bryan y Dwayne a sigui su pasonan y cu tur dos a bay bon den deporte di beisbal. Victor tin 4 ruman, Mundo, Mario(+), Josef y Lando y e tin un ruman muher cu yama Imelda. Actualmente Victor ta gosando ya pa 6 aña di su pensioen. Victor a conta nos cu el a lanta den Nicaraguastraat y cu el a cuminsa hunga basketball cu 15-16 aña cu Aruba Junior.

Prome den C klas despues den B y A klas y cu nan a yega di bira campeon varios aña. E hungadornan di e tempo ey tabata Shon Papa de Windt, Felix Badouille, Boy y Chu Brion (q.e.p.d). Nan conticante mas grandi tabata Plymouth. E disciplina di antes tabata diferente compara loke bo ta wak durante weganen di futbol na unda ta manda boter y hopi biaha e muchanan ta fresco. Antes tabata tin mas disciplina. Si Victor ta admiti cu nan a sake durante un wega di softball.

E ta corda cu ya promer cu wega e empire a bise "si bo bin fresco mi ta saca bo foi wega". Ora nan a ponche cu un "bola" el a bay reclama pero e empire a bise "afo" y tabatin pushamento. Semper el a respeta desiccion di arbitro pero Victor ta di opinion cu mag di reclama. "Nunca nan no a sakami for di wega den beisbal" Victor a bisa acerca orguyosamente. Cu 11 aña Victor a cuminsa hunga beisbal den Little League, esaki tabata bou di encargo di e-miher manager di e tempo ey esta senor Luis Swaen(+).

E hungadornan den e team di Little League tabata eo Oslin Toppenberg, Eddie



Backer, Freddie Tromp, Donny y Shon Papa de Windt. Na aña 1963 Victor a hunga den Junior League pa despues hunga 25 aña pa Marlboro. Nan tabata tin hopi competencia cu Pepsi Cola y Coca Cola pues e muchanan di San Nicolaas. Ora cu el a cuminsa hunga beisbal e tabata pitcher despues su brasa a cai el a hunga primera base. E arma principal como picher tabata e dropball. Victor ta corda cu un diadomingo merdia na Sportpark, cu 3 bola y 0 strike, na unda e pitcher di Coca Cola a bin cu un recta anto el a mande un homerun den centerfield.

Niun pitcher no por a domine, pero e pitcher cu e tin hopi aprecio pe ta Rock Angela.

Hungando e puesto di primera base nan a cuminsa yamele tambe "stofzuiger". Victor tabata pitcher y 4 bate, e puesto di 4 bate ta apunta e miher batidor. Mayoria biaha un pitcher ta bati ultimo. Victor a hunga mas cu 30 aña e deporte di beisbal. Tambe el a hunga veterano pa Aruba Juniors. Victor a hunga 15 aña softball pa Casa Haime di cual na a bira 13 aña campeon. Victor a hunga futbol den A klas y hoofdklas pero e no a gusta e deporta aki. Su deportenan preferi tabata softball y beisbal. E logro mas grandi y importante den beisbal tabata e copan Antillano. Victor ta di opinion cu e wega di beisbal, a cai masha hopi mes awendia y e ta referi cu antes ora di wega ya for di 2'or e stadion tabata yen di fanaticado caba.

E momento mas desapunta pe tabata hungado den Marlboro y cu nan a perde e titulo di campeon contra di Coca Cola, pasobra den e playoff (best of five). Nan tabatin 2 wega gana y nan a bira perde 3 wega sigui. Un hungador cu Victor ta aprecia hopi ta Richard Simons cu ta un bon amigo di Victor te ainda. Victor ta corda Richard como un tremendo short-stop y cu su tokenan.

Den su infancia Victor a hunga riba e tereno di Aruba Junior of e tereno na unda awor tin postkantoor. Nan tabata hunga softball y futbol. E "handschoennan" tabata di pakinan Tide y Fab. Victor ta sigui conta cu bou di palo dilanti di refresqueria "La Popular" nan tabata haci chansa cu amigo y amiganan. E tempo ey no tabata tin gang

pero tabata hunga futbol contra Rancho y naturalmente algun biaha e wega ta sali for di man.

Victor a hunga na diferente pais eo Bonaire, Puerto Rico, Colombia, Venezuela, Santo Domingo, Ecuador, Antiyas, Harlemse Ballway na Hulanda y na Italia unda el a forma parti di un seleccion di 18 hungador. Na Italia nan a keda 1 siman y a gana Curaçao cu 12-6.

Den beisbal Victor a bira Campion di Aruba 8 biaha cu Marlboro y a 5 biaha campeon di Copa Antillano. Victor a sali "campeon bad" na 1970 y "campeon pitcher" den dooble A na aña 1969. Den Softbal Victor a sali 13 biaha campeon cu Casa Haime y 3 biaha campeon den Copa Antillano. Na aña 1991 Victor a retira for di e dos deportenan esta beisbal y softball. Ainda Victor ta sigui e weganen di "Grandes Ligas", Cincinnati ta su team favorito. Victor tin un sobrino Jason, yiu di su ruman muher, cu ta den softball. Victor su consejo pa e muchanan di awendia ta pa scucha e consehonan di nan coachnan.

Tur loke e e coachnan tin cu bisa e muchanan ta pa nan tin mas disciplina, si nan kier bay Merca bo mester tin disciplina pasobra eynan disciplina ta manda. Victor ta satifecho cu su carera pero su soño tabata pa e hunga den "Grandes Ligas" pero ya e no a resulta. Antes no tabatin oportunidad manera awe paso awor tin mas scout cu ta bishitando Aruba. E deporte cu Victor ta practica awor ta domino pero no pa competi pero pa dibirti. Victor ta hopi agredido na su mayornan y Marlboro cu a yude destaca den su carera den deporte. Centro di Bario Playa Pabao ta invitabo invita e bario di Playa Pabao, hungadornan di Marlboro y Casa Haime y e pueblo di Aruba engeneral pa pasa bishita e bunita exposicion na nomber di Victor Adriaan Albus dia 18 di maart na unda lo otorga e premio Cultural Playa Pabao.